

मार्निंग डोगरी न्यूज़ बुलेटिन, समें. 09-20 Hrs

<><><><><><>

Headlines

- प्रधानमंत्री नरेन्द्र मोदी होरें जी-20 दे मजूदा अध्यक्ष ब्राजील आस्सेआ गरीबी ते भुक्खमरी खलाफ शुरू कीते गेदे कुलसंसारी गठबंधन आली पैहू दी सराहना कीती ऐ।
- माता वैष्णो देवी जी दे दरबार च इस ब'रे दिसम्बर दे खीरै तगर रिकार्ड 95 लक्ख शा मते श्रद्धालुएं दे पुज्जने दी मेद ऐ।
- रामबन जिले दे समाज कल्याण विभाग नै बाल मजदूरी ते नशाखोरी बारे लोकें गी जानकार करने लेई बक्ख-बक्ख प्रोग्रामें दा सरिस्ता कीता।
- सांसद जुगल किशोर शर्मा होरें रियासी च दिशा मीटिंग लोआई ते सब्बने विकास परियोजनाएं गी समें उप्पर मुकम्मल करने दे निर्देश जारी कीते।

<><><><><><>

PM G-20

प्रधानमंत्री नरेन्द्र मोदी होरें रियो डी जेनेरियो च जी-20 शिखर सम्मेलन दरान भुक्खमरी ते गरीबी खलाफ कुलसंसारी गठबंधन शुरू करने लेई ब्राजील दी अध्यक्षता दी सराहना कीती। इक सोशल मीडिया पोस्ट च श्री मोदी होरें आखेआ जे ब्राजील आस्सेआ शुरू कीती गेदी इक पैहलकदमी कन्नै दुनिया भरै च गरीब-भुक्खे लोकें गी उबड़ा चुक्कने ते खाद्य सुरक्षा गी जकीनी बनाने लेई कुलसंसारी एक्के कन्नै मदाद थ्होग। उनें इस पैहलकदमी च भारत दे पूरे पराते सुखने दा भरोसा दोआया। प्रधानमंत्री मोदी होरें समाजिक, समावेश, भुक्ख ते गरीबी खलाफ लड़ाई बारे जी-20 शिखर सम्मेलन दे मुख्क इजलास च हिस्सा लैता ते इस मौके पर बोलदे होई आखेआ जे इक धरती इक परिवार इक भविक्ख जी-20 दे ब्राजील शिखर सम्मेलन च बी उन्ना गै प्रासंगिक ऐ जिन्ना पिछले ब'रे नमीं दिल्ली च लग्गे दे सम्मेलन च हा।

<><><><><><>

SMVD

जम्मू खित्ते दे रियासी जिले दी त्रिकुटा पहाड़ें उप्पर स्थित माता वैष्णो देवी जी दे मंदरै च इस ब'रे अजें जगर 86 लक्ख शा मते श्रद्धालुएं मत्था टेकेआ ऐ। आकाशवाणी दे जम्मू संवाददाता नै जानकारी दित्ती ऐ जे एह गिनतरी दिसम्बर दे खीरै तगर बधियै 95 लक्ख शा मती होने दी मेद ऐ। हर ब8रे माता दे दरबार मत्था टेकने आले श्रद्धालुएं दी गिनतरी च बाद्धा दिक्खने गी लब्धदा ऐ। म्हीने—म्हीने हासल होने आले आंकड़े मूजब ध्यारें दे म्हीने च श्रद्धालुएं दी आमद च बाद्धा दिखेआ गेआ। कल अक्तूबर म्हीने गै 8 लक्ख 74 ज्हार 657 यात्रिं माता वैष्णो देवर दे दरबार च मत्था टेकेआ। अक्तूबर म्हीने रोल 14 शा 18 ज्हार यात्रु ते देयाली ते होरने ध्यारें दरान 28 ज्हार शा 38 ज्हार यात्रु माता दे दरबार पुज्जे हे। 1986 च श्री माता वैष्णो देवी श्राईन बोर्ड आस्सेआ प्रबंध दा कम्म सांभने मगरा थमां गै लगातार यात्रुएं दी गिनतरी च बाद्धा दिखेआ जा'रदा ऐ।

<><><><><><>

Ramban

रामबन जिले च नशाखोरी ते बाल मजदूरी पर रोक लाने लेई समाज कल्याण मैहकमे आस्सेआ बाल अपराध नेया कनून तैह्त प्रभावत लोकें गी सुरक्षा ते दिक्खभाल उपलब्ध कराने लेई इक अभियान चलाया गेआ ऐ। इस बारे आकाशवाणी दे जिला संवाददाता अजयदीप सिंह कन्नै गल्ल करदे होई रामबन दे जिला समाज कल्याण अधिकारी राहुल गुप्ता होरें आखेआ.....

<><><><><><>

Jhiri Mela

जम्मू दे झिड़ी मेले च मकामी लोकें आस्सेआ हत्थें नै तैआर कीते गेदे समेयान दे स्टाल लोकें लेई आकर्षण दा केन्द्र बने दे न। साढ़े जम्मू आले जिला संवाददाता अंकुश शर्मा नै दस्सेआ जे ग्रामीण विकास मैहकमे दी मदद कन्नै केई स्टाल महिलाएं आस्सेआ लाए गेचे न जिंदे च उंदे समेयान दी शैल बिक्री होआ करदी ऐ। साढ़े संवाददाता कन्नै गल्ल करदे होई इक स्टाल मालक रजनी देवी नै दस्सेआ.....

<><><><><><>

Udhampur-Medical Camp

जिला सेहत प्राधिकारण उधमपुर आस्सेआ नारायणा सुपर स्पेशल्टी अस्पताल दे सैहयोग कन्नै टिकरी च इक मुफ्त सेहत जांच दा कैप लोआया गेआ जिस दरान डाक्टरें कोई 500 मकामी लोकें दी जांच कीती ते केई लोड़मदे गी मुफ्त दोआइयां बी उपलब्ध करोआइयां। इस आयोजन दे बारे च आकाशवाणी दे जिला संवाददाता अचिन दूबे कन्नै किश डाक्टरें ते मकामी लोकें गल्ल कीती.....

<><><><><><>

PM-Indira

अज्ज साबका प्रधानमंत्री इंदिरा गांधी हुंदे जनम दे मौके पर प्रधानमंत्री नरेन्द्र मोदी होरें उनेंगी श्रद्धांजलि भेंट कीती ऐ। अपनी इक सोशल मीडिया पोस्ट च उनें लिखेआ “ साबका प्रधानमंत्री श्रीमती इंदिरा गांधी होरें गी उंदी जनम जयंति पर श्रद्धांजलि”।

<><><><><><>

Jugal Kishore DISHA

जम्मू-सांबा ते रियासी चुनावी हल्के थमां लोसभा दे सांसद जुगल किशोर शर्मा होरें कल जिला विकास तालमेल ते निगरान कमेटी दिशा दी प्रधानता कीती। एहदा उद्देश्य जिले च बक्ख-बक्ख केन्द्र प्रायोजित स्कीमें ते चला'रदे विकास कम्में दा अमलावरी दा जायजा लैना हा। मीटिंग दरान सांसद होरें रियासी जिले दी सब्बने बडिडएं केन्द्र प्रायोजित स्कीमें दी ठोस ते माली उपलब्धिएं दा जायजा लैता। सांसद होरें अधिकारिएं गी निर्देश दित्ते जे सब्बै कम्में गी तैह् समें अंदर मुकम्मल कीता जा तां जे लोकें गी एहदे लाह हासल होई सकन। उनें बक्ख-बक्ख विभागें गी आपसी तालमेल बनाइयै कम्म करने लेई गलाया तां जे सब्बै परियोजनाएं ते चेचा करी शिड़क ढांचे, शिक्षा ते सेहत क्षेत्र कन्नै जुड़ी दियां परियोजना समें उप्पर मुकम्मल होई सकन। उनें सरकार दी सेवाएं गी लोकें तगर पजाने लेई नमीं तकनीक दे इस्तेमाल करने लेई बी गलाया। उनें अधिकारिएं गी सब्बने विकास कम्में दी गति दा समें समें उप्पर जायजा लैने दे बी निर्देश जारी कीते।

<><><><><><>

Jawahar Tunnel

पुरानी जम्मू कश्मीर राष्ट्रीय जरनैली शिड़क पर बनिहाल ते काजीकुंड बश्कार केई दहाकें तगर इक महत्वपूर्ण ते इक मात्र संपर्क रेही दी ऐतिहासक जवाहर टनल मरम्मत ते नमें सिरेया सोआरे जाने दे बाद परतियै खुल्लने लेई तैआर ऐ।

आकाशवाणी दे जम्मू संवाददाता नै तानकारी दित्ती ऐ जे जुलाई 2023 च एहदी मरम्मत ते सोआरने दे कम्में दी शुरूआत सीमा सड़क संगठन बीआरओ दे प्रोजेक्ट बीकन तैह्त कीती गई ही जेह्दा मकसद दऊं टयूबें आली इस सुरंग जेह्दी लम्बाई कोई 5 किलोमीटर बनदी ऐ, गी आधुनिक तकनीकें कन्नै लैस करियै एह्दे सामरिक ते ऐतिहासक महत्व गी संरक्षित करी रखना ऐ।

<><><><><><>

Doda

डोडा जिले च कल सहकारिता हफ्ता चायें-चायें मनाया गेआ। इस दरान समारोह च बड़ी मती गिनतरी च लोकें हिससा लैता, जिनेंगी बक्ख-बक्ख स्कीमें ते उंदे फायदे बारे जानकार कीता गेआ। इस दरान अतिरिक्त उपायुक्त पुरन सिंह होरें गलाया.....

<><><><><><>

DC-Doda SSP

डोडा दे जिला विकास कमीशनर हरविंदर सिंह ते एसएसपी संदीप कुमार मेहता होरें जरनैली शिड़क 244 पर खलैनी कश रवा करदे मजूरे-श्रमकें दे कैप दा दौरा लाइयै उंदे सुरक्षा प्रबंधें दी समीक्षा कीती। एह्दे इलावा उनें बक्ख-बक्ख अजेंसिएं आस्सेआ तोड़ चाढ़े जा'रदे कम्में दा बी निरीक्षण कीता। उनें उत्थें उपलब्ध रौहने दी बवस्था, बिजली, पानी ते सफाई दे इंतजामें दा बी निरीक्षण कीता ते अजेंसिएं गी निर्देश दित्ता जे इंदे लेई नियमें मूजब लोड़चदी सब्बने सुविधाएं दी पक्की बवस्था जकीनी बनाई जा।

<><><><><><>